

四庫全書

史部

欽定四庫全書

史部  
齊乘卷五

詳校官編修<sub>臣</sub>曹振鏞

檢討<sub>臣</sub>德生覆勘

總校官檢討<sub>臣</sub>何思鈞

校對官監丞<sub>臣</sub>張曾炳

謄錄監生<sub>臣</sub>王思謩

欽定四庫全書

齊乘卷五

元 于欽 撰

亭館

下

開元寺 般陽城內通志唐李邕書開元寺碑在淄州

今寺內無邕碑而晉人小楷樂毅論石刻在焉蓋淄

川東有樂毅廟

東十八里地名樂店

石移寺中子昂公嘗屬余

打數本每以印手不高為恨土人亦不知為貴

懷范樓 長山縣金人所建有泰和碑刻

范公祠 長山縣宋治平二年尚書祠部員外郎知長山縣事韓澤建

李勣廟 般陽北二十五里

東海淵聖廣德王廟 萊州西北二十里漢以來古廟  
宋開寶六年敕建叅知政事賈黃中碑

四知廟 萊州東門內祀漢東萊太守楊震

無訟堂 萊州公署後宋政和間建

劉將軍廟 萊州城內晉東萊太守有德於萊人故祀

之

幸臺 萊州城內相傳漢武帝東游訪安期生所築有碑字滅不可攷

燕臺 萊州城北慕容德以掖為青州築此臺觀

六龍灣龍祠 萊州北前有輪井石口如車輪號曰天井能興雲雨金泰和間禱澍有感碑記存焉

三山亭 萊州城北東坡有詩

僊臺 膠水縣東北五十里青山下列仙傳公沙宿飲

白鶴泉得仙嘗止此臺之上臺極峻絕今不可登

游仙宮 萊陽縣南馬丹陽得道之地

賓日樓 登州公署後東坡志林云東坡居士移守文  
登五日而去眷戀山海之勝與同僚飲酒賓日樓酒  
酣作木石一紙投筆而歎自謂此來之絕河內史全  
叔取而藏之樓側舊有納川亭東有頌德堂

蓬萊閣 登州北三里海濱田橫寨相對本海神廟基  
宋治平中郡守朱處約以其地太高峻移廟西置平

地於此建閣實為山海登臨勝槩閣下有獅子洞洞前有冷然泉古稱浪井潮生浪起則沒水退則甘冽如故舊有甘泉亭閣下碎石為海浪淘激歲久圓滑土人謂之彈子渦黑白者可以奕坡公嘗以數百枚養石菖蒲作詩遺垂慈堂老閣上古今題詠甚多而宋人秦樓月一詞頗飄逸詞云烟漠漠水天搖蕩蓬萊閣蓬萊閣朱甍碧瓦半浸寥廓三山謾有長生藥茫茫雲海風濤惡風濤惡仙槎不見暮沙潮落登人

皆歌之

濱都觀 棲霞縣北五里邱長春祖宮遺山云邱赴龍  
庭之召億兆之命懸於好生惡殺之一言誠有之則  
雖馮瀛王之對遼主不是過自是黃冠之人十分天

下之二予有感焉

清真  
觀記

秦宮 寧海州文登縣東北百八十里古老相傳始皇  
所築東南臨海縣有七井後人因立祖龍廟

朝陽亭 文登縣宋慶厯間建



舜廟 濟南府城第二坊按圖經古舜祠在廟山舜井  
在此今廟在井傍有宋碑城外古舜坊即廟山故道  
娥英廟 趵突泉側祀娥皇女英今廢

宣聖廟 憲府東大明湖上有宋崇寧賜辟雍詔大觀  
御製政和手詔三碑在焉

歷下亭 府城驛邸內歷山臺上面山背湖實為勝絕  
少陵有陪李北海宴歷下亭詩

鵲山亭 城北鵲山湖上少陵詩序登歷下員外新亭

亭對鵲山湖者是也今廢

北渚亭 水經注灤水北為大明湖西有大明寺水成  
淨池池上有亭即北渚也池今名五龍潭潭上五龍  
廟亭則廢矣湖上舊有水西亭環波亭並見南豐子  
由諸賢詩今廢

仁風廳 舊府治即今憲司前衙也其後靜化堂禹功  
堂芙蓉堂名士軒竹齋凝香齋水香亭采香亭芍藥  
廳並見蘇曾諸公詩今即後堂有宋元祐名士軒碑

廳西古竹猶存芍藥尚餘數本

歷山堂 灤源堂 舊在趵突泉上北堂曰歷山南堂  
曰灤源南豐知齊州日建此以館客有齊州二堂記城  
內又有閱武堂亦見公詩又有望湖樓李師中所建  
皆廢泉西金人建勝棨樓亦壯麗近亦為水所壞

百花橋 今曰鵲華大明湖南岸橋南百花洲洲上百  
花臺環湖有七橋曰芙蓉曰水西曰湖西曰北池之  
類是也南豐詩云莫問臺前花遠近試看何似武陵

游又云從此七橋風與月夢魂長到木蘭舟槩可想  
見今皆廢矣惟百花橋與灤源石橋僅存灤源橋在  
城西子由作記欽按濟南東藩名郡自唐李北海杜  
子美宋曾南豐東坡兄弟相與登臨歌詠於湖山之  
上當時政治風流猶可想見而亭館隳廢百無一二  
今人亦那復知之方且戚戚於矯飾汲汲於資級以  
此馳騖一世反有竊笑古人者矣

酈食其廟 府城內今廢章邱臨濟鎮南有酈商家者

即食其冢也食其為田廣所烹故齊有墓弟商不應葬此

開元寺 府城內建於唐

祐德觀 府城內唐碑云瑞氣觀宋曰天慶今改祐德觀內古有扁鵲祠金人因創神農廟碑記存焉

靈巖寺 府南八十里靈巖山中其山與方山相連南接泰山北帶龍洞極為深秀疑即水經之玉符山也寺乃佛圖澄卓錫之地有立鶴泉佛日巖辟支塔自

山麓至寺門十餘里古松叅天亦謂之十里松歷代  
碑志具存

天齊山廟 府城內按漢志濟南國治東平陵有天山  
郡南山也以其在齊因曰天齊山猶臨淄淵曰天齊  
淵者是也俚俗乃云山高與天齊不經甚矣

高唐亭 濟南豐齊北古高唐地有此亭

謝恩臺 棣州北亡金賑饑所立有金碑

廉頗相如祠 棣州陽信縣

李牧祠 陽信縣按趙將相有祠在此豈西北界趙廉  
藺亦嘗與齊戰齊人慕其賢而祀之云有墓者非是  
秦臺 濱州東十三里高八丈周二百步相傳秦始皇  
東游紫蒲繫馬之處亦名蒲臺般陽之蒲臺縣以此  
氏焉

真祐廟 濱州城內祀齊客茅焦兄弟宋大觀三年賜  
額真祐廟政和六年兄封允濟侯弟彊濟侯金末祠  
廢土人呼為茅神臺

段子明祠 子明齊將有墓在蒲臺宋元符三年賜額  
善應廟建中靖國元年封善應侯俗云段干木者非  
是

德風堂 德州公署舊堂

鬲津堂 舊在德州

顏魯公廟 德州城內燬于兵至元二十三年即故基  
重建

管輅祠 平原城內



唐明宗廟 五代唐莊宗拔德州以李嗣源守之莊宗  
敗嗣源入大梁是為明宗民號其屯兵之地為明靈

寨

即今清平縣也

立廟祀焉

龍泉寺 平陰東南四十里齊天統中建下寺有石刻  
劉豫阜昌三年皇子皇弟符改甲乙院亦有碑又阜  
昌中題名最多佛像古雅皆數百年物上方大佛與  
龍泉觀音非晚唐人不能造

丘壠

蘇秦冢 益都府東二十五里秦自燕奔齊齊大夫與秦爭寵使人刺秦不死殊而走齊王求賊不得秦謂齊王曰臣即死車裂臣以徇于市曰蘇秦為燕作亂于齊如此賊必得矣齊王如其言殺秦者果出王因而誅之秦死猶詐也裂其軀而不恤哀哉般陽西又有秦冢與此為二豈葬而復詐乎嘗論戰國之士以詐功耀天下者秦儀也秦洛陽人儀魏人乃曰齊人多詐置二子於何地乎

營邱 臨淄西二里塔寺後爾雅云水出其左曰營邱  
淄縈其東南故以名也晏子曰先君太公築營之邱  
謂太公築邑此地通志云營邱即今臨淄縣或云在  
濰州昌樂其地本顓帝之墟爽鳩始居其後季荊伯  
陵因之太公又因之按顓帝都于濮陽少昊時爽鳩  
已居營邱又為顓帝之墟何邪在昌樂者乃營陵城  
元魏誤以為營邱而縣焉營邱之上自唐長慶間立  
太公桓公廟今惟宋景祐三年碑存

桓公祠墓 臨淄東南十里水經注云女水西有桓公  
冢甚高大一墓二墳晏謨曰依陵記非葬禮如承世  
故與其母同墓而異墳伏琛所不詳也冢東女水原  
有桓公祠侍其衡奏魏武帝所立衡曰近日路次齊  
郊瞻望桓公墳壠在南山之阿請為立祀為塊然之  
主然則俗謂二王冢又云公與女之冢皆非也唐貞  
觀十年太宗詔禁樵採

三士冢 臨淄南一里一墓三墳諸葛武侯梁父吟步

出齊城門遙望蕩陰里中有三墳累累正相似借  
問誰家墳田疆古冶子力能排南山又能絕地紀一  
朝被讒言二桃殺三士誰能為此謀相國齊晏子注  
引晏子春秋曰公孫捷田開疆古冶子事景公勇而  
無禮晏子言於公餽之二桃令三子計功而食公孫  
捷曰吾一搏特狴再搏乳虎功可以食援桃而起田  
開疆曰吾仗兵而卻三軍者再功可以食援桃而起  
古冶子曰治嘗從君濟河鼃銜左驂治潛行水底逆

流百步順流九里得黿而殺之左操馬尾右挈黿頭躍而出功可以食二子曰吾勇不若子功不逮子取桃不讓是貪也然而不死是無勇也刎頸而死治曰二子死之治獨不逮又刎頸而死或曰晏嬰賢相豈有殺士之名蓋曹操既殺孔融楊脩又送禰衡荊州假手黃祖三子者天下之望也武侯梁父吟殆為此設然則晏子春秋反因梁父吟而附會如山海經之於天問耳

田和冢 府北二十里普通店和為田齊之太公皇覽  
作太公呂尚冢按檀弓云太公封于營邱比及五世  
皆反葬于周此不應有冢皇覽最叵信如云濟南歷  
山上有太申冢皆此類東南者謂是齊胡公冢胡公  
獻公父亦反葬于周

五公冢 臨淄東南十里齊昭公靈公惠公頃公孝公  
五墳相近

高敬仲墓 臨淄東北二十里又名白兔冢左傳莊九

年鮑叔曰管夷吾治於高侯即敬仲也

杞梁冢

臨淄東三里齊莊公襲莒杞梁死焉其妻迎

其柩而哭之詳見檀弓左傳

黔敖冢

臨淄東九里齊饑黔敖設食於路以待餓者

蒯徹墓

臨淄東二里漢書徹范陽人高祖曰徹齊辨

士故卒葬此胡氏管見曰韓信功齒三傑不可忘也

迎陳之禮可贖自王之釁拒徹之意可免失期之罪

未有反計則當侯以次國逆謀既露猶當宥其子孫



愚謂韓信失職怨望者有之逆謀既露則無也以信之智料事成敗審矣背水之陣計曰信非得素撫循士大夫也所謂驅市人而戰非置之死地則走耳寧得用乎夫以大將握兵猶臂使指尚慮及此失職之後乃謀詐赦諸官徒奴欲以集事此鼠竊之慮耳連百萬之衆據三齊之勝制天下之權武涉蒯徹游說百端利害切至尚不肯變乃與陳豨挈手步庭令豨舉兵吾徒中起天下可圖此又臧獲之見也信謀果

爾何前智而後愚哉信非蕭何不留及其失職怨何  
必深何噉呂后殺信遂誣信反千載之下尚不覺悟  
信其冤哉

逢萌冢 郡志在濰州營陵古城中記在益都縣云高  
士冢

葵邱 臨淄西三十里古齊邑左傳莊八年齊侯使連  
稱管至父戍葵邱瓜時而往及瓜而代杜注在臨淄  
即此地齊桓公葵邱之會則在陳留

管仲墓 臨淄東南二十三里

晏子墓 臨淄古城北三里唐貞觀中禁十五步內不得樵採高密平原又各有墓與此為三欽按晉載記曰慕容德登營邱望晏嬰冢顧謂左右曰禮大夫不逼城而葬平仲古之賢人達禮者也而生居近市死葬近城豈有意乎青州秀才晏謨對曰孔子稱臣先人之賢豈不知高其梁豐其禮蓋政在家門故儉以矯世存居湫隘卒宜擇地而葬乎所以不遠門者冀

悟平生意也以謨考之臨淄墓為真

辟間渾墓 壽光西南三十里俗呼釣魚臺渾晉幽州  
刺史慕容德陷廣固殺之渾子道秀詣德請與父俱  
死德曰孝子特原之

臧臺 壽光西四十里舊有宋碑云是臧武仲之墓愚  
按左傳襄公二十三年臧紇致防而奔齊至昭公十  
年平子伐莒取鄭獻俘始用人于亳社臧武仲在齊  
聞之曰周公其不饗魯祭乎是時武仲客齊已十八

年其終不歸魯而卒葬于齊乎又西五里有馬陵臺  
水經注云不知是誰之冢世謂馬陵臺

熙熙臺 壽光北城上蓋取老子衆人熙熙如登春臺  
立名不知初於何代

鳳凰臺 壽光西北三十里宋天聖間鳳凰下此因築  
臺有宋碑北有南皮臺前有東岳南岳行祠金永安  
二年碑刻在焉疑即古平望亭也平望亦漢縣見伏  
琛齊記

蒼頡臺 壽光西北洱水所經水經注謂孔子問經石  
室非也通志云蒼頡石室記二十八字在蒼頡北海  
墓中土人呼為藏書室周時自無人識逮秦李斯始  
識八字曰上天作命皇辟迭王漢叔孫識十三字豈  
孔子至齊亦嘗訪焉故有問經之目

過宋臺 壽光南二十五里

官臺 壽光北七里有鹽官壽光古有灌亭豈灌轉  
為官亭廢為臺邪俗謂縣周回有十臺九城信然如

熙熙過宋官臺之類皆不可攷

任光冢 樂安城西二里俗傳任光冢按光南陽宛人  
更始初為信都太守從光武破王郎封阿陵侯卒子  
隗嗣隗仕至司空又傳三世至孫世徙封北鄉侯北  
鄉始為齊地自北鄉上官封無至齊者光何緣有墓  
在此豈北鄉侯冢邪

貝邱 博興南五里左傳齊侯田于貝邱見彘射之彘  
人立而啼乃公子彭生也即此地亦曰貝中聚

董永墓 博興南三十五里世說永東漢人鬻身以葬  
親般陽長山南又有冢廟皆出野語

青邱 樂安北清水泊蓋以青邱得名齊景公有馬千  
駟田于青邱與晏子游于少海皆此地少海謂渤海  
也

伯氏冢 臨朐古駢邑伯氏所食後為管仲所奪伯氏  
沒齒無怨言故城西有其冢

路史齊遷莒邢鄆部邢  
本紀邑故城在臨朐東

南



麓臺 濰州西孤山之麓一小阜下名麓臺村寰宇記  
云州西二十里高二丈三尺是弘墓也墓後有泉號  
曰補生泉九域志云公孫弘讀書處

王裒墓 濰州南三十里

徐幹墓 濰州東五十里俗呼為博士冢幹建安七子  
魏志云北海劇人卒葬此

伯牛阜 昌邑西北十里又東子騫阜古有閔子祠今  
名三阜南有子游祠竝見寰宇記今曰蓮花陂三阜

金少卿  
卷五  
者蓋亦三賢之意但未詳所始

逢丑文墳 昌邑南五里記謂丑文食邑都昌故墳在此然則般陽逢陵非其邑也

渠邱 密州安邱自漢有渠邱亭周武王封少昊之裔  
茲輿於莒初都計春秋時遷莒至莒子朱居渠邱成  
八年晉使申公巫臣如吳假道于莒與渠邱公立於  
池上

柴阜 密州安邱西五十里邴原之墓在焉

慈阜 柴阜之東齊記云營陵南今濰州昌樂四十里  
有慈阜魏奉常王脩葬此俗以脩至孝故此邱以慈

表稱

脩母以社日亡每社設  
祭悲泣鄰里為之罷社

管寧墓 柴阜東十餘里蓋與原墓相近

王章墓 寰宇記云安邱縣西南四十里通志金石略  
云章碑在密州章仕至京兆尹日蝕上封事劾大將  
軍王鳳為鳳所陷下獄死初章為諸生學長安病臥  
牛衣中泣與妻訣妻怒曰朝廷尊貴誰如仲卿者病

困不自激昂涕泣何也後章至京兆尹上封事妻又止之曰人當知足獨不念牛衣中涕泣時邪章不聽果死獄中妻子徙合浦鳳死始得還其妻亦賢矣哉因表而出之然章泰山鉅平人何緣葬此惜其碑斷毀不可考也

孫嵩墓 安邱南四十里欽嘗寓宿太虛宮夢有趙先生者入謁謂欽曰聞君脩齊志僕有良友葬安邱其人節義高天下今世所無也請載之以勵衰俗欽覺

而語梅仲昇以為鄉人趙伯善共訪之伯善愕然及  
聞趙岐傳始悟為孫賓石也嗚呼邠卿處複壁中著  
書以名世固奇士非賓石之高義則志弗克伸矣偉  
哉若人尤奇者斯夢也故識之

康成祠墓 膠州高密縣西北五十里劉宗山下山產  
磨石古礪阜也水經亦謂之碑產山高士傳云袁紹  
屯官渡逼玄隨軍不得已載病至元城率葬於劇東  
後因墓壞歸葬礪阜墓前有廟廟之南有唐開元碑

縣西有鄭公鄉孔北海告高密縣所立者劇東舊葬地即今益都府東五十里鄭墓店是也因高密有鄭公鄉土人訛為鄭母云

古冢 郡國志云即墨城北有古冢或發之有黃牛從埏門出犯之即吼不可動又云縣有徐誕弟子夏侯臯墓臯死後有人遇臯以手巾寄信與誕乃棺中物也

雙女冢 膠州計斤城南耆舊相傳宋靖康間臨海王

氏姊妹與姑避難為敵所得王氏謂曰汝放姑還者  
當從汝也敵縱姑去王氏姊妹罵曰我閭閻家豈為  
汝汙即投海而死居人得其屍而葬焉此與唐奉天  
竇氏二女無異惜乎不得其家世之詳

曹嵩墓 沂水縣南百二十里嵩操之父也避難琅邪  
操使迎之輜重百餘兩陶謙別將張閭襲殺嵩於華  
費間取其財物因奔淮南操引兵攻謙拔十餘城阬  
殺男女十餘萬口雞犬亦盡吁嵩居亂負乘操復讎

濫殺閭閻貪財煽禍一事而作戒數端此之謂也

王祥墓 沂州北二十五里墓西戚溝湖孝感泉剖冰躍鯉之地傳云求忠臣於孝子之門祥至孝晚乃失節事晉郝陵川續後漢書列之篡臣惜哉余故表而出之為昏耄持祿者之戒

鮀墓 沂州東南百里羽山之下

奚公冢 滕州東南青邱村奚山下古奚邑

韋賢墓 鄒縣嶧山之陽石表大刻曰漢丞相韋賢墓



左邱明 嶧州東北七十里元和志東平平陰縣東南  
復有邱明墓

王肅墓 嶧州東南二十五里

劉靈墓 嶧州東北二十里已上並見寰宇記

靈墓所  
今名劉

曜  
村

淳于髡墓 般陽東六十七里史記

蔡相冢 萊州膠水西北金尚書右丞相蔡松年墓也  
松年自號蕭閑老人子珪亦好學博古第進士仕至

禮部郎中出守濰州卒縣南復有蔡邕冢伯喈陳留  
圉人未嘗歷齊豈亦松年族人之墓遙祖伯喈邪

閔子祠墓 濟南府城東門外五里宋熙寧七年濟南  
太守李肅之即墓前置祠立碑蘇子由作記東坡書  
又濰州昌邑西北子騫阜上古亦有廟濮州范縣又  
云有墓未詳

陽貨墓 章邱西北十里高丈餘貨嘗奔齊又適晉趙  
未知死葬何地云此有墓未詳

房彥謙墓 章邱西南三十里唐刺史追封臨淄公玄  
齡父也墓有碑李百藥文歐率更書極精近聞村人  
以打碑之擾毀仆之良可歎已

鄒衍墓 章邱東十里

燕軍冢 長清縣南十五里寰宇記云謂是燕昭王者  
後人誤也恐是燕軍之冢耳

班超冢 寰宇記云在長清東北二十五里定遠扶風  
平陵人以和帝永元十四年八月徵還洛陽九月卒

齊地曷為有墓豈以齊有東平陵而附會之邪

赫胥氏墓 章邱臨濟鎮東故朝陽城內

劉豫墓 濟南城西鵲山下墓中產蝎按宇文懋昭劉  
豫錄云豫景州阜城人宋元符中登第累官至殿中  
侍御史被劾出為兩浙察訪至真州丁父憂居焉金  
兵陷河南高宗過維揚起復豫知濟南豫到郡金人  
利誘之百姓遮豫願以死守豫竟出降金人徙豫知  
東平節制河南兵馬及張邦昌廢豫使子麟以重賂

結尼堪及其腹心高慶裔輩求僭號尼堪假以百姓  
推戴請于金主立豫為帝國號大齊改元阜昌初據  
東平繼遷于汴僉發鄉兵三十餘萬付子麟姪猊領  
之分道寇宋大敗而歸豫猶請戰不已金主下詔廢  
為蜀王父子竝徙上京豫僭位凡八年至上京改封  
曹王而死初豫僭立有醉民罵豫曰你是何人要作  
官家大宋何負於你進士邢希載等亦勸豫歸宋豫  
皆殺之豫父子嚴刑暴斂取快一時見兵士賣陵中

玉腕即置淘沙官再發河南山陵及發民間無主墳墓行五等稅法民鬻子者皆稅百錢下至倡優日有納課臣下納女獻妻者皆得遷官貲罪去汴之日金帛糧斛山積父子姬妾各百餘人貪淫不道有如此者金皇統間沂州普照寺碑亦謂豫專以苛政理國知衆不附尤狹中多忌者足證其暴云或問欽曰契丹入汴梁而民驚散金人入中原而民恐懼其勢一也契丹則以南帝啗趙延壽父子而終不肯立金人

則始帝張邦昌又帝劉豫何也應之曰嘗聞蕭太后  
責延壽父德鈞曰汝為人臣既負其主不能却敵又  
欲乘亂徼利所為如此何面目以求生其論甚正抑  
知帝王大器須英雄之人始克負荷豈叛降之人所  
能堪邪金人則不然乘高宗之懦且脅且和計議百  
出遂立劉豫為帝矣至如劉豫直以賂結權貴而得  
立其為卑猥又邦昌之所羞使高宗若稍有雄才擒  
之如獵狐兔元遺山取豫而黜石勒不知其何說也

豫嘗游平陰龍泉寺有留題來者訕笑遺山復為解  
嘲云河邊羖羝尚能飛無角無鱗自一齊甲子紛紛  
等兒戲壁間休笑阜昌題然則豫在當時自有定論  
遺山何故曲為之說黨惡如此豈不為斷腕后所笑  
邪自古經生文士學博才高而性癖識陋害理者不  
少如遺山之流可不戒哉

婁敬祠墓 德州德平東南二十里祠在墓側五代周  
顯德間建膠州復有奉春墓未詳



東方朔祠墓 德州東四十里古厭次城北祠在墓南  
宋元符間封智辨侯顏魯公守平原書先生畫贊立  
碑祠下今碑移州署內棣州陽信縣古邵城又云有  
墓益都壽光縣東方村又有廟先儒謂非高祖用子  
房乃子房用高祖欽亦謂曼倩非漢武所得御曼倩  
以智御漢武耳比子房赤松之遊其迹尤晦漢延爵  
祿惟此輩人不為所縻嗚呼高哉欽嘗過其廟有詩  
云甲乙不焚珠壁帳百錢囊粟且婆娑殿前怒擗黃

金戟天上偷將紫玉珂班固有評真率爾子雲祿隱  
果如何漢初除却推秦手只許先生逸網羅

張騫墓 平原縣東北騫嘗窮河源平原河所經因附  
會耳

風土

唐虞三代風化尚矣春秋以降列國殊俗去古未遠自  
秦漢以後千八百年總天下風俗五變愈下蓋自漢至  
西晉一變五胡南北至陳隋一變隋唐至安史之亂一

變五代一變宋金之交又一變安史滅君臣之義未盡  
至五代則幾矣五胡南北之路未斷迨宋時則絕矣是  
皆關天地之大運非若春秋戰國異政殊俗專可以人  
事論也故今天下四海九州特山川所隔有聲音之殊  
土地所生有飲食之異小小習尚不同謂之土俗可也  
其大好惡大趣向則系乎一氣之運一代之治不得以  
異俗書也然自漢史以來代存列郡之俗亦不得不攷  
古以驗今至於土產亦略具前式以相證云

前漢地理志曰齊地虛危之分野也東有淄川東萊琅邪高密膠東南有泰山城陽北有千乘清河以南渤海之高樂高城重合陽信西有濟南平原皆齊分也少昊之世有爽鳩氏虞夏時有季荊湯時有逢公柏陵殷末有薄姑氏皆為諸侯國此地至周成王時薄姑氏與四國共作亂成王滅之封師尚父是為太公詩風齊國是也臨淄名營邱故齊詩曰子之營兮師古曰毛詩作還遭我乎穰之間兮又曰俟我於著乎而齊詩作營

此亦舒緩之體也

詩記曰前漢地理志載齊風俗俟我於著乎而此亦舒緩之體雖非

此篇所主然廣谷大川異制民生其間異俗剛柔輕重遲速異齊皆學者所當觀也詩可以觀其此類歟余按漢世去古未遠聲詩猶傳得其聲而味之則知其為舒緩之體若以訓詁詞義求之遠矣

吳季

札聞齊之歌曰泱泱乎大風也哉其太公乎國未可  
量古有分土亡分民太公以齊地負海舄鹵少五穀  
而人民寡廼勸以女工之業通魚鹽之利而人物輻  
湊後十四世桓公用管仲設輕重以富國合諸侯成  
伯功身在陪臣而取三歸故其俗彌侈織作冰紈綺

繡純麗之物號為冠帶衣履天下初太公治齊修道  
術尊賢智賞有功故至今其士多好經術矜功名舒  
緩闊達而足智其失夸奢朋黨言與行謬虛詐不情  
急之則離散緩之則放縱始桓公兄襄公淫亂姑姊  
妹不嫁於是令國中民家長女不得嫁名曰巫兒為  
家主祠嫁者不利其家民至今以為俗痛乎道民之

道可不慎哉

余按平陰廣里有巫兒山豈以主祠女得名邪襄公鳥獸之行南山之詩刺之

是已然近代齊俗婦女比之他郡容飾樸野淫風幾  
熄欽十五六歲在鄉里時市井不聞猥言婦女亦簡

出入三十年來俗為大變市有蒟蒻語邑  
雜倡妓居漸與燕鄭同風矣是誠可憂也昔太公始

封周公問何以治齊太公曰舉賢而上功周公曰後  
世必有篡殺之臣其後二十九世為彊臣田和所滅  
而和自立為齊侯初和之先陳公子完有罪來奔齊  
齊桓公以為大夫更稱田氏九世至和而篡齊至孫  
成王而稱王五世為秦世滅臨淄海岱間一都會也  
其中具五民云

欽按論語曰齊一變至於魯魯一變至於道說者

曰夫子之時齊彊魯弱然魯猶存周公之法制齊  
由桓公之霸為從簡尚功之治太公之遺法變易  
盡矣故齊俗急功利喜夸詐乃霸政之餘習所謂  
夸詐亦霸者假仁義之稱耳漢史直謂其失夸奢  
言與行謬虛詐不情此汲黯詰公孫弘之言也弘  
為宰相不能面折庭爭常背公卿正議阿順上指  
黯目之曰詐當矣詐者弘也齊人豈盡然歟且如  
婁敬亦縱橫人也求見言事虞將軍欲與鮮衣敬



曰臣衣帛衣帛見衣褐衣褐見則其所守可知況過於敬者可以詐槩其俗乎夫自戰國以來天下並爭惟齊魯之間學者弗廢漢興言易自淄川田何言書自濟南伏生魯詩則浮邱伯齊詩則轅固生春秋則齊胡毋生論語則琅琊王卿膠東庸生遭秦滅學傳經淑後多是齊人故史於齊魯之俗獨曰好經術尚禮義他國則否亦可見其俗之美也先王之化流風善政為世移易豈能無弊齊俗

之弊始於管晏較之王政為少差耳故經秦歷漢  
敦經重義風俗不薄逆亂不萌漢武帝以燕王旦  
上書欲圖為嗣怒曰生子當置齊魯禮義之鄉乃  
置于燕果有爭心旦後欲反劉澤謀以臨淄應之  
尋為雋不疑所誅先是七國作難齊亦不與唐世  
藩鎮自河北淮蔡以至川蜀無不叛亂惟淄青一  
鎮未嘗拏兵暨朱溫圍昭宗于鳳翔詔徵諸道兵  
莫有應者獨平盧節度使王師範奉詔感泣奮兵

討溫事雖無成足表忠赤載諸史策斑斑可攷由此言之忠義之風齊俗為多不幸逮金之亂李全父子盜據此方戶編為兵人教之戰父叛于南子叛于北衣冠之族變為卒伍忠義之俗染以惡名全起羣盜的不知何人

維揚志云濰州人齊東野語濰州人或又云萊州人

未知孰是養子璫本徐希稷之子又出異類

齊東野語云全養子

璫本徐希稷之子賈涉鎮維揚日璫與涉諸子同學其後全無子屢託涉祝之涉以希稷舊與全稔遂命與之詳見後論

非齊氏族客亂山東劫民為逆自速誅

夷然敗俗汙善不可不辨或曰然則王著何如曰  
著盜殺權臣蓋刺客聶政之流惡則惡矣豈壇畔  
逆之比哉欽惟忠孝之道禮義之俗本諸人心況  
去古未遠流風可尋非緣禍亂可得而泯也故愚  
謂齊本詩書之國忠義之邦攷證史實非泛言者  
嗚呼司馬溫公有言上行下效之謂風薰陶漸漬  
之謂化淪胥委靡之謂流民心安定之謂俗夫教  
化薰陶固系于上不淪胥于弊陋不委靡于頽波

安乎忠孝定乎禮義俾俗不愧古此亦鄉賢之責也

隋志曰齊郡舊曰濟南其俗好教飾子女淫哇之音能使骨騰肉飛傾詭人目俗云齊倡本出此也祝柯縣俗賓婚大會餽饌雖豐至於蒸膾嘗之而已多則謂之不敬共相誚責此其異也大抵數郡風俗與古不殊男子多務農桑崇尚學業其歸於儉約則頗變舊風東萊人尤樸魯故特少文藝

愚按漢志趙女彈弦跕躑徧諸侯之後宮至隋則  
濟南多倡豈亦高洋之遺風歟今齊俗比燕趙諸  
郡號為樸野東方尤甚惟濟南水陸輻湊商賈所  
通倡優游食頗多皆非土人欽佐廉察日朔望行  
香三皇廟廟旁見倡家立命遂之逮今城中無此  
輩上官賢牧存心風化此亦易事云

洛陽伽藍記

後魏楊街之撰

後魏太傅李延寔者莊帝舅也永

安中除青州刺史將行奉辭帝謂寔曰懷博之俗世

號難治舅宜好用心副朝廷所委寔答曰臣年迫桑榆氣同朝露人間稍遠日近松邱臣已久乞閑退陛下渭陽興念寵及老臣使夜行罪人裁錦萬里謹奉明敕不敢失墜時黃門侍郎楊寬在帝側不曉懷搏之義私問舍人溫子升子升曰吾聞至尊兄彭城王作青州刺史聞其賓客從至青州者云齊土之民風俗淺薄虛論高談專在榮利太守初欲入境百姓皆懷搏叩頭以美其意及其代下還復以搏擊之言其

向背速於反掌是以京師謠語曰獄中無繫囚舍內無青州假令家道惡腸中不懷愁懷博之義起在於此也潁川荀濟風流名士高鑒妙識獨出當世清河崔叔仁稱齊士大夫曰齊人者外矯庶幾內懷鄙恡輕同毛羽利等錐刀好馳虛譽阿附成名威勢所在促共歸之苟無所資隨即捨去言囂薄之甚也

欽按此亦五胡南北離亂之際青有此俗蓋牧守有賢否民心有好惡上之黜陟賞罰不足以厭其



心激之使然也甚則至於孫恩之醢縣令黃巢之  
殺官吏豈特懷搏而已書云子視天下愚夫愚婦  
一能勝予聖人之畏民如此寧有怒上之俗哉金  
末內翰鄭子聃知沂州作十愛詞有云我愛沂陽  
好民淳訟自稀誰言珥筆混萊夷行見離離秋草  
鞠園靡俗有登萊沂密腦後插筆之語子聃治沂  
民淳訟簡可比山谷江西道院之論故云後之為  
牧疾民訟而無德化專恃刑罰欲勝民者能無愧

乎

王曾沂公言行錄云沂公青州人宋真宗問曰卿鄉里  
諺云井深槐樹麤街闊人義疎家給人足也曾對曰井深槐  
樹麤土厚水深也街闊人義疎家給人足也真宗善  
其對

余按古諺鄙齊俗之薄於義也齊自孟嘗任俠過  
義後世反敗其俗至於近代不惟鄉義疎薄骨肉  
之恩亦虧喪矣蓋因金亂瘡痍之餘重以李瑄之

困民有跬地銖產必分膝下嬰孺亦於昆仲有彼  
已之辨風俗大壞且五代干戈之際民有累世同  
居旌表者在在紀之豈有承平百年風俗乃薄惡  
如此可勝歎哉漢志曰南陽好商賈召父富以本  
業潁川好爭訟分異黃霸化以篤厚君子之德風  
也然則齊俗之弊果不可變邪

齊乘卷五

欽定四庫全書

史部  
齊乘卷六

詳校官編修<sub>臣</sub>曹振鏞

檢討<sub>臣</sub>德生覆勘

總校官檢討<sub>臣</sub>何思鈞

校對官監丞<sub>臣</sub>張曾炳

謄錄監生<sub>臣</sub>王思謩

欽定四庫全書

齊乘卷六

元 于欽 撰

人物

齊記補載漢少翁晉石崇云崇父苞為青州刺史生崇于臨淄小字齊奴夫崇貪財賈禍至死不悟今流俗之弊正坐此失苟得而不顧義務積而不務用財之所在骨肉以之而離良心由是而死崇蓋守錢虜之作俑者齊自太公之後管晏諸賢聖門高弟與夫漢世大儒鄭

康成諸公三國人才之冠琅邪諸葛高節蓋世北海管寧此而不書顧彼之取何其謬哉至於神仙高尚之流魯連安期豈不偉歟少翁之徒罔上被誅何足纂也故曰人物非賢才不書此之謂也抑嘗論之人才之多寡繫于教養之當否三代以學校養士迨乎春秋戰國之際賢俊不可勝用皆周之遺才也漢尚經術光武明章益崇儒學幾復三代故漢世人才之多獨不愧古剪于黨錮裂于三國名節愈厲英豪迭出皆漢之遺才也降

及隋唐始以詞章取士教養之道劣于古昔人才浸微  
唐初惟齊州房玄齡宋惟益都王曾為齊士稱首較于  
兩漢則不及矣以此卜之則知教養之道不可不當其  
餘則各訂于後云

太公 後漢志琅邪西海縣太公呂望所出有東呂鄉  
廟舊在臨淄西營邱宋碑存焉冢在縣南十里與頃  
公冢相近愚按檀弓曰太公封于營邱比及五世皆  
反葬于周註謂太公受封留為太師死葬鎬京五世



獻公以上皆從葬焉則齊無太公之墓或曰齊人思

其德葬其衣冠云

路史云名涓  
字子牙汲人

桓公 舊與太公同廟齊自太公為世胄之祖桓公為  
五霸之宗威王亦戰國賢主然以篡立義不敢取餘  
無可稱者

仲山甫 太公之後為宣王冢宰兼太保王命築城于  
齊尹吉甫作烝民詩以送之

管仲 本穎上人齊相墓在臨淄南牛山之阿

見史記  
正義

晏平仲 萊之夷維人故宅左臨淄小城北門即左傳  
近市宅也墓亦在焉

成覲 齊人謂景公曰彼丈夫也我丈夫也吾何畏彼  
哉可謂志士

鮑叔 墓在滕州北十五里 甯戚 墓在膠水縣西  
隰朋 東郭牙 弦寧 王子成甫 新序曰管

仲請於桓公以甯戚為田官隰朋為大行東郭牙為  
諫臣王子成甫為大司馬曰君欲治國強兵此五子

足矣如欲霸王則夷吾在有司請吏公曰以告仲父  
又請公曰以告仲父如是者三在側曰一則仲父二  
則仲父易哉為君公曰未得仲父則難已得仲父何  
為不易桓公與羣臣飲酒謂鮑叔曰姑祝寡人鮑叔  
奉酒起而祝曰君無忘其在莒也管仲無忘束縛從  
魯也甯戚無忘飯牛車下也桓公避席拜曰寡人與  
大夫皆無忘夫子之言社稷必不廢矣

麥邱邑人 祝桓公無得罪於羣臣百姓者

郭墟野人 謂桓公善善不能用惡惡不能去所以亡者桓公賞焉

小臣稷 桓公曰士傲爵祿者輕其主主傲霸王者輕其士吾敢傲霸王乎五往始得見稷

石他人 陳恒弑簡公不肯盟而自殺又有子淵棲者恒以勇士劫之亦不從二人竝見新序

國成子高 齊大夫擇不食之地而葬見檀弓又有國昭子春秋有國書國佐皆其族也

陳文子 名須無齊大夫

齊太史 昆弟三人書崔杼弑君者左氏逸其姓名惜

哉

徒人費 死襄公之難又有石之紛如孟陽皆襄公小

臣亦死節

高柴 史記作鄭人家語曰齊人高氏之別族墓在沂

州向子城側

公冶長 家語魯人史記齊人集註兩存之

樊遲 家語魯人史記齊人

陳亢 家語作陳人愚按檀弓亢乃齊大夫陳子車之弟疑是齊人

梁鱣 家語齊人

步叔乘 史記齊人

公折哀 家語齊人鄙天下多仕于大夫家者故未嘗屈節其亦汶上之亞歟墓在般陽城北

后處 史記齊人 右八人聖門弟子

公孫丑 滕州北公村有墓

萬章 乃滕州南萬村有墓 右皆齊人孟子弟子餘  
見鄒廟從祀

滕文公 滕州有廟

蚺鼃 齊士師以孟子言諫齊王不用而去

匡章 齊人孟子禮貌之必有所取故集註云衆惡必  
察可見聖賢至公至仁之心

檀子 盼子 黔夫 種首 威王臣四子將照千里

見通鑑

淳于髡齊稷下學士髡衍輩七十餘人餘不取者大學衍義曰孔子沒異端遂作鄒衍淳于髡田駢之徒各著書以干世主不可勝紀申不害商鞅其害尤甚孟子所深距者惟楊墨二氏程子所謂楊墨之害甚於申韓佛老之害甚於楊墨然則衍輩亦異端之流髡獨知尊孟子稱之曰夫子又一日而見七人於宣王差賢于諸子故取之或曰均異端也申韓則不聞



而廢揚墨距之而熄佛老則闢而愈熾何邪蓋異端  
至佛老而極道至後世而晦如人元氣既衰痼疾可  
得療乎然闢之而不廓者其說有二夫鬼神祭祀之  
禮聖人所先制緣人情理明儀備殆戰國以降盟詛  
相持鬼神之理不明事鬼之情愈切佛氏乘之怖以  
死生誘以禍福凡古人之敬事鬼神齋戒禱祠報本  
祈福之意一歸于佛廣大包羅驅世有情信之事之  
此雖羸迹而勢不可廓聖賢有不動心之學世儒多

務外馳於利害怵迫之餘見佛氏之堅定則灑然心  
服謂道在頓省之間不知吾道自有此理體用尤精  
舍已耘人往往皆是此為精微其理亦不易辨麤以  
籠愚精以釣賢非復三代之治而欲決此疾猶以杯  
水救輿薪之火也其熾宜矣

閻邱卬 年十八求仕於宣王王曰士亦華髮墮顛而  
後可用子年稚未可也卬曰尺有所短寸有所長華  
髮墮顛與臣何異宣王用焉

香居 諫宣王為大室者

王斗 皇甫士安高士傳齊隱士

黔婁子 齊隱士守道不詘威王師之

王蠋 臨淄畫邑人墓在愚山西

王孫賈 齊大夫奉母訓誅淖齒者

田單 臨淄人 愚按蠋以布衣死節賈以一夫討賊

單之功偉矣所以勵齊人之氣未必非二子也故先

之

孫武子 濰州昌邑縣北海濱有廟武孫臏齊軍師

司馬穰苴 並齊人

顏蠋 齊人晚食以當肉東坡所謂巧於貧者

子奇 齊人十八為阿邑宰出倉廩以賑貧乏邑內大  
化見說苑

無鹽女 齊人姓鐘離名春宣王后

宿瘤女 齊東郭采桑女閔王后並列女傳

貫珠人 諫齊王怒田單者

太史敦 莒人君王后父敦曰女不取媒自嫁污吾世  
終身不見余謂後世外戚如楊國忠之流求通房闥  
不遺餘力敦真有守哉

雍門司馬 諫王建者惜逸其姓名

荀卿 少游學于齊三為稷下祭酒避讒適楚春申君  
以為蘭陵令

田文 齊靖郭君田嬰子

田橫 元和志海州東海縣北五十七里有田橫國即

田橫島

魯仲連 齊人

安期生 東郭先生 梁石君 右三人皆齊處士見  
蒯通傳安期又見列仙傳云琅邪阜鄉人賣藥海邊  
人言千歲公始皇賜金璧棄去不受留書報曰後千  
歲求我蓬萊山下 欽按神僊之說六經所無原於  
老子玄牝抱一之論秦漢間怪迂之士設為誇大之  
言以徼當世多欲之君至有封侯尚主貴震天下如

文成五利之徒終以詐誅故後世談僊者率歸誕妄  
至紫陽朱夫子以明理盡性之學會古今諸家而折  
衷之以為僊者匪難但偷生為不可見於感興之詩  
又隱名而校參同至取遠遊王子之言以為長生久  
視之要訣何也蓋僊者必有大賢明睿之資精察造  
化純一不離如釋氏之慧定又得明師訣其火藥毫  
釐不差根氣清厚福如王者庶幾有成也成謂能長久雖與天  
地同弊亦不觀安期之策撼項羽魯連之輕世肆志  
能不散也

陳希夷之不帝而隱槩乎其人下此則山林枯槁之徒嗇氣葆精差可少病以待天年冀其竊化機以出宇宙萬無一焉雖使紫陽復生亦必道還汝具一隻眼也

秦淳于越 齊人諫始皇曰今陛下有海內而子弟為匹夫卒有田常六卿之患何以相救事不師古而能長久者非所聞也始皇下其議為李斯所絀

茅焦 齊人諫始皇遷母者司馬溫公有言風俗天下



之大事也於茅焦亦見之矣自三代有殺身成仁之教至於戰國習以成風義之所在蹈死如歸奉起而力禁之誹謗者族偶語者棄市至戮諫者二十七人而茅焦猶諫蓋由當時風俗驅之見義而不見死故也秦能因俗以治三代可及必欲峻刑變俗以自感亡至於後世傷一諫臣沮一言者則天下從風而靡亦薄俗使然也

漢四皓夏黃公

留侯世家注云夏黃公姓崔名廣字

少通齊人

蓋公 膠西人

婁敬 齊人通典曰齊俗人情變詐故高帝詈婁敬曰  
齊虜以舌得官夫敬料匈奴匿兵爭利智也勸帝勿  
擊忠也高祖不從致有白登之困高祖失言敬何詐  
之有

叔孫通 薛人

伏生名勝 濟南人墓在朝陽故城東五里見水經

東方朔 平原人

鄒陽 齊人傳有王先生公孫攬皆齊之智士故陽曰  
鄒魯守經學齊楚多辨智韓魏時有奇節而辨智者

流於詐也

轅固 齊人漢武始好儒迂仲舒疾轅固公孫達于前  
張禹孔光顯于後西漢風俗不美良有以夫

鄒長倩 菑川人遺弘書曰公孫弘以元光五年為國  
士所推上為賢良國人鄒長倩以其家貧少自資致

乃解衣裳以衣之釋所著冠履以與之又贈以芻一  
束素絲一襪撲滿一枚書題遺之曰夫人無幽顯道  
在則尊雖生芻之賤也不能脫落君子故贈君生芻  
一束詩人所謂生芻一束其人如玉五絲為緝倍緝  
為升倍升為絨倍絨而為紀倍紀而為緞倍緞而為  
襪此自少至多自微至著士之立功勲効名節亦復  
如之勿以小善不足脩而不為也故贈君素絲一襪  
撲滿者以土為器以蓄錢貝其有入竅而無出竅滿

則撲之土麤物也錢重貨也入而不出積而不散故  
撲之士有聚斂而不能散者將有撲滿之敗可不誠  
歟故贈君撲滿一枚猗歟盛哉山川阻脩加以風露  
次卿足下勉作功名竊在下風以俟嘉譽欽纂齊乘  
凡書傳所通習如景公登牛山杞梁黔敖之類則不  
詳載如此篇者蓋西漢奇文世所罕見且其積絲之  
喻撲滿之戒實古今之格言最有益於學者故備載  
焉弘開館延賢鄉有二奇士皆不知引之則所延者

果何人哉此其有以為詐人也

撲滿吳人名曰藏瓶次卿弘字漢書弗載

公孫弘 菑川人開東閣以延賢人亦足以為百世宰

相之師故載

路史淄州南四十里大薛山弘生處

兒寬 千乘人御史大夫

嚴安 臨淄人騎馬令

終軍 濟南人諫大夫墓在臨淄南牛山之西地名終

村又歷城南九十里有終軍村

王訢 濟南人代田千秋為丞相封宜春侯

淳于意女緹紫 臨淄人

疏廣疏受 蘭陵人

于公 字定國丞相西平侯

匡衡 東海承人御史大夫

蕭望之 蘭陵人關內侯

王吉 字子陽琅邪阜虞人貢禹同鄉史稱王陽在位

貢禹彈冠言其取舍同也然吉為宣帝言曰欲治之

主不世出公卿遭遇其時未有建萬世之長策舉明

主於三代之隆者也其務在於期會簿書斷獄聽訟而已此非太平之基也甚欲有所匡建與賈誼仲舒之意同宣帝乃以為迂禹為元帝言曰廩馬萬匹宮女數千園陵郡國廟皆當減毀務遵儉約元帝悉納用其言蓋圖遠大者難為功舉細務者俗易從二人所見如此惡在其為取舍同也善乎司馬溫公論曰孝元優游不斷讒佞用權當時之大患禹不以為言恭謹節儉孝元之素志禹孜孜言之何哉使禹之智



不足知惡得為賢知而不言其罪大矣余故黜禹以  
為人臣汎言塞責者之戒

諸葛豐 琅邪人司隸校尉孔明祖

田何 齊人以諸田徙杜故號杜田生守道不仕惠帝  
幸其廬以受業為易者宗見高士傳

儒林傳 易自田何後有琅邪人魯伯邴丹王橫諸縣  
人梁邱賀父子東萊人費直 書自伏勝後有千乘  
人歐陽生子孫世學兒寬師也濟南人林尊齊人周

堪魯詩自浮邱伯後有琅邪王扶齊詩自轅固  
後有琅邪人大司馬師丹皮容韓嬰詩有淄川人  
長孫順三詩後世皆亡毛萇詩又得鄭康成箋行于  
世大戴禮琅邪人徐良公羊胡毋生之後有琅邪  
人王中公孫文東門雲筮路左咸淄川任公穀梁  
有不其人房鳳皆齊人明經而伏生諸儒已載前論  
不復出焉

鄭崇高密大族哀帝擢為尚書僕射納用其言每見

喜曰我識鄭尚書履聲諫寵董賢浸疏之責崇曰君門如市何以禁切主上崇對曰臣門如市臣心如水  
上怒下獄死

眭弘 蕃人以明經為議郎至符節令元鳳三年上書  
被殺孝昭徵其子孟為郎

顏安樂 薛人眭孟姊子積學至齊郡丞

母將隆 蘭陵人京兆尹執金吾王莽秉政以隆少時  
不肯與交誣以罪免官徙合浦

鮑宣 渤海人司隸以忠直為王莽所殺妻桓少君

栗融 禽慶 蘇章 薛方 四人皆齊隱士去官不

仕王莽見鮑宣傳

逢萌 都昌人學長安王莽殺子宇萌曰三綱絕矣不  
去禍將及人即解冠掛東都門隱勞山光武徵不起  
又有同郡徐房王君公與萌友善亦隱遯不仕君公  
僮牛自晦時人語曰避世牆東王君公或曰兩漢人  
才首蓋公與逢萌豈有意乎應之曰先輩有言能令

漢家重九鼎桐江波上一絲風又曰世祖功臣三十  
六雲臺爭似釣臺高此之謂也萌墓在北海縣西南  
營陵城中

伏湛 琅邪東武人伏生九世孫傳經學仕至司徒清  
靜無競東州號曰伏不鬪子隆死節兄子恭傳齊詩  
王良 蘭陵人王莽時寢疾不仕光武徵拜大司徒司  
直在位恭儉布被瓦器

衛宏 臨沂人序毛詩訓古文尚書光武拜議郎作漢

舊儀載西京雜事傳于世

吳良 議郎

江革 世稱江巨孝並臨淄人

劉寵 東萊人號一錢太守姪劉繇漢末揚州刺史

曹裒 薛人明慶氏禮博物識古為儒者宗

寒朗 薛人為明帝辨楚獄者

侯史光 掖縣人散騎常侍與皇甫陶等持節循省風

俗還奏事稱旨遷少府卒家貧賜錢以葬

趙彥 琅邪人勸宗資發五陽郡兵從孤虛推遁甲破

徐兗群盜

鄭康成 大司農高密人宋封高密伯

滕撫 北海劇人涿令破東南群盜者

王望 琅邪人青州刺史擅發廩賑饑者

淳于恭 北海淳于人以孝義徵為郎

童恢 琅邪姑幕人循吏

周璆 樂安人

陳蕃傳

公沙穆 膠東人明經舉孝廉遷郃相

承宮 琅邪姑幕人中郎將明春秋

司馬均 東萊人隱居教授誠信行乎鄉里爭曲直者  
輒曰敢祝少賓乎心不直者終不敢少賓均字祝詛  
也

牟融 太尉 郎顗 明京房易

周澤 甄宇 二人皆博士明公羊傳

孫嵩 五人竝安邱人嵩安邱有墓



徐苗 淳于人累世相承皆以博士為郡守

諸葛武侯 琅邪人

孫乾 北海人事昭烈為秉忠將軍

禰衡 平原人文士才辨性多傲忽傲其儕輩而已衡  
敢罵辱曹操有威武不挫之志文人相輕者愧衡多  
矣

魏徵 士管幼安 北海朱虛人

邴原 幼安同郡人魏丞相徵事

王烈 亦北海人漢末三人皆適遼東依公孫度以避  
亂度安其賢民化其德

國淵 任嘏 並樂安人康成弟子俱仕魏

王脩 北海營陵人魏青州別駕母社日亡悲感鄰里  
為罷社

任旄 樂安博昌人黃巾賊到博昌聞旄姓名曰夙聞  
任子旄天下賢士那可入其鄉

王基 東萊曲城人魏征南將軍

諸葛誕 琅邪人揚州都督起兵討司馬昭不克而死  
吳太史慈 東萊黃人建昌都尉孫策曰聞君為太守  
劫州章赴文舉詣玄德皆有義烈天下智士也

諸葛瑾 琅邪陽都人吳豫州牧孔明族弟吳志曰葛  
氏本諸人徙陽都陽都先有姓葛者故時人謂之諸  
葛

徐盛 莒人吳安東將軍

是儀 營陵人吳尚書僕射

滕肩 劇人吳都亭侯

晉羊祜 泰山南城人南城久廢地屬費縣祜費縣人也上征吳策唐彬乃鄒人

司徒王導

臨沂人

南史弘融曇首儉僧虔恭志筠彬皆導族

劉毅

東萊人尚書僕射謂晉武為桓靈者

任愷

博昌人侍中

光逸

樂安人八達

解系

濟南人守正不阿為趙王倫所殺

伏滔 安邱人大元中拜著作郎專掌國史領本州大中正子系之亦有文名

繆播 蘭陵人晉懷帝中書令詔命盡忠為國為東海王越所害朝野憤惋曰善人國之紀也而加害焉其能終乎越死贈衛尉

王尼 城陽人不拜東海王越越問之對曰公無宰相之能是以不拜

劉盾 掖縣人避亂依冀州刺史邵續續欲降石勒盾

勸續歸晉元帝以胤為丞相參軍仕至江州刺史

王羲之 司徒導從子余按晉室清談王謝不能免羲之獨不為流俗所移觀其止殷浩北伐之書對謝安登冶城語真豪傑之士哉使其得君王謝不足多後世徒以書札掩其器識故朱子惜之

劉超 琅邪人蘇峻遷帝于石頭猶啓帝受經者

顏含 琅邪人

劉敏元 北海人忠義傳

徐邈 姑幕人儒林傳

左思 臨淄人作齊都及三都賦

石坦 劇人無居業不娶妻弔喪會葬同日共時處處

見之姚萇之亂莫知所終蓋異人也

王隱  
晉書

秦王猛 劇人孫鎮惡宋史有傳孫憲後魏并州刺史

北海公清身率下北史有傳九子世號九龍子晞曰

非不愛作熱官但思之爛熟耳亦名言也或曰先儒

謂孟子以後人物惟有子房孔明魏晉以降張賓崔

浩皆比子房王景畧則謂如諸葛數子優劣果何如也愚曰孟子王佐之才使值炎劉之奮未必屑漢庭功業諸公皆功名士也故以才智相方不大相遠就其出處進退觀之則有間矣浩事暴君以殺身賓贊羯勒以傾晉景畧視二子為優比之諸葛則不能無愧嗚呼天下英才不遇者多矣幸而成功不一二數也景畧之儔容可棄乎

南燕晏謨 臨淄人撰齊記晉載記曰南燕主慕容德



登營邱問謨以齊之山川邱陵賢哲舊事謨歷對詳  
辨畫地成圖德深嘉之拜尚書郎德又因饗宴乘高  
遠矚顧尚書魯邃曰齊魯固多君子當昔接慎巴生  
淳于鄒田之徒蔭脩簷臨清沼馳朱輪佩長劔恣非  
馬之雄辭奮談天之逸辨指麾則紅紫成章俯仰則  
邱陵生韻至於今日荒草頽墳氣消烟滅永言千載  
能不依然

元魏賈思伯

益都人弟思同俱好經史思伯仕至都

官尚書謙恭下士人曰公今貴重寧能不驕思伯曰  
衰至便驕何常之有世以為雅言思同仕至侍中今  
壽光南有墓碑

唐永 北海平壽人後魏北地良將性清廉無積蓄妻  
子不免饑寒二子陵瑾皆儒雅知名次子瑾字文周  
賜姓萬紐于氏

王弘 臨沂人隱會稽釣魚采藥謝靈運顏延之竝相

欽重

沈約  
宋書

王素 琅邪人隱東陽山山中有蜺蟲聲清而形醜作賦以自況

齊任昉 博昌人博學能文

明僧紹 平原人初隱勞山弟慶符以青州刺史罷任隨歸隱江東齊太祖稱為外臣

孟喜 蘭陵人父孟卿父子竝傳禮易

臧榮緒 莒人撰東西晉紀與關康之俱隱京口時號

二隱

顏見遠 琅邪人南齊御史中丞蕭衍殺齊主見遠死  
之子協孫之推皆知名

諸葛璩 琅邪人齊梁徵辟皆不就隱居教授妻子不  
見喜愠之容

梁孫謙 東莞人循吏

劉勰 東莞人撰文心雕龍

伏曼容 密州人臨海武昌太守解易詩論語老莊  
隋隱士徐則 郟人隱縉雲山絕粒養性

杜松贊 北海人大業末賊攻北海執松贊使諭城降  
松贊罵賊而死

張軌 臨邑人與樂安孫樹仁為莫逆交每易衣而出  
以此見稱西魏恭帝時除隴右府長史卒家無餘財  
唯有書數百卷

張買奴 平原人高齊太常博士北史儒林傳云買奴  
經義該博門徒千餘人諸儒咸推重之尤精服氏春  
秋又云自晉杜預注左氏預玄孫坦坦弟驥在宋竝

為青州刺史傳其家業故齊地多習之

孫益德 樂安人其母為人所害益德童幼復仇不避

魏孝文后特免之見北史孝行傳

又北海王閭數世同居有百口見節

義傳

苟金龍妻劉氏 平原人苟為梓潼太守疾病賊圍城

劉氏代帥將士拒戰賊奪水城中渴甚劉仰天號訴

得雨以衣服懸絞取水卒完城北史烈女傳

宋劉穆之 東莞人左僕射

臧燾 莒人兄子質守盱眙拒魏太武者

徐廣 東莞人撰晉紀

顏延之 琅邪人作五君詠

段文振 北海人諫煬帝寵突厥者

唐房玄齡 齊州人墓在濟南東南采石山

秦叔寶 歷城人

羅士信 亦歷城人濟南府城中有羅姑井相傳士信

故宅

段志玄 臨淄人房秦段皆凌煙功臣志玄孫文昌仕  
至太尉文昌子成式太常少卿並有才名

馬周 荏平人

杜伏威 章邱人大業末據淮南歸唐封太子太保兼  
行臺尚書令

任敬臣 棣州人五歲喪母哀毀天至問父曰何以報  
母父曰揚名顯親可也乃刻志從學舉孝廉虞世南  
器其人薦為弘文館學士終太子舍人



員半千 齊州全節人武陟尉歲旱勸令發粟賑民令  
不從及令謁州半千悉發之下賴以濟刺史怒囚半  
千于獄會薛元超持節度河責刺史曰君有民不能  
卹使惠出一尉尚何罪釋之後仕至太子諭德封平  
原郡公 或問先賢行蹟例多不載惟賑卹一事自  
子奇王望半千三人皆詳書之何也對曰欽聞富鄭  
公不言使遼之功至知青州活饑民五十餘萬自謂  
賢於中書二十四考此豈細務哉延祐六年己未齊

地大饑父子相食欽銜命賑卹濟南六縣泊鹺竈饑  
民嘗以勸率富民出粟太多賑濟太廣見責于憲府  
時官僚有幸此凶歲捐斗升以鬻子女舉曰過房悉  
輦以北欽則訪鬻子者為贖還之乃怒曰是違例徼  
譽也欽憤鬱久矣無從發之故於三子之事不自知  
其筆之瀆也嗚呼董煢有言人微無肯信其言官小  
莫能行其志微子墨卿吾誰與言歟

顏魯公 弟杲卿竝琅邪人

刺史蔣欽緒 萊州人與沂州蕭至忠姻家戒至忠曰  
君材不患不見用患非分而求耳至忠果附太平公

主預禍

崔融 齊州人鳳閣舍人諸孫多顯宦

符令奇 臨沂人田悅反死節

張允濟 北海人循吏

顏師古 臨沂人注漢書其叙例諸家名氏有琅邪伏

儼北海劉德皆漢末注班書者因附見云

王仲邱 琅邪人明禮

王希夷 滕人為人牧羊取傭以葬親隱徂徠山玄宗訪以道義授朝散大夫聽還山

郭虔瓘 歷城人右驍尉將軍兼北庭都護戰功甚多王無競 東萊人監察御史臨朝斥宰相宗楚客偶語左遷太子舍人

高適 渤海人諫議大夫忤權近出刺蜀年五十始為詩即工

高沐 渤海人貞元中進士李師古辟署判官師道叛  
沐以誠款結天子為師道所殺

盧惟清妻徐氏 淄州人惟清貶播州會赦徐迎惟清  
至荊州聞惟清死二奴將劫徐歸下江徐數其罪奴  
不敢逼徐倍道至播州得惟清尸還葬齊澣高其節  
作詩頌之

崔信明 益都人秦川令吟楓落吳江冷者

五代王凝妻李氏 青州人斷臂者

石昂 臨淄人昂讀書好學不求仕進節度使符習高  
其行名為臨淄令入朝以公事謁監軍楊彥朗贊者  
以彥朗家諱石更其姓曰石昂昂責彥朗曰內侍奈  
何以私害公昂姓石非石也彥朗大怒昂即解官去  
語其子曰吾本不欲仕亂世果為刑人所辱

邊鳳 濱州人五世同居無異爨天子旌其門復其家

又王陶密州人數世  
同居五代史孝友傳

王師範 青州人 歐陽子曰孟子謂春秋無義戰予

謂五代無全臣其仕不二代者以國繫仕非一代者作雜傳夫入于雜誠君子之所羞而一代之臣未必皆可貴欽按五代名節李氏尚矣青州五臣惟石昂有孝節稱疾辭祿及節度使王師範為可取其餘皆不足貴也史稱師範好學以忠義自許為治有聲績朱溫圍鳳翔師範見詔書泣曰吾屬為帝室藩屏豈得坐視天子困辱雖力不足當死生以之遂起兵討溫求助於楊行密斬朱友寧于青州及淮南兵歸力

不能支遂降溫為其所族嗚呼師範欠兵敗一死耳  
原其本心非朝梁而暮晉者故綱目特書曰平盧節  
度使王師範發兵討朱全忠又曰王師範以淮南兵  
擊朱友寧斬之曰討曰斬則與之之意可見矣況其  
處死不亂又毅然丈夫哉汨之雜傳則其志亦可哀  
也已故特表而出之

南唐韓熙載 青社人五代之亂熙載投南唐累官至  
中書侍郎多置妓妾晝夜歌舞謂僧德明曰吾為此



行正欲避國家入相之命僧問其故熙載曰中原常  
虎視於此一旦真主出棄甲不暇吾不能為千古笑  
端初熙載之走江南也李穀送別各言所志熙載曰  
江南果相我當以長驅定中原穀曰中原若相我下  
江南如探囊中物穀後相周世宗定江南而熙載之  
言不驗胡氏以為熙載文士高談非穀沈毅有智畧  
之比是故然已使世宗唐主易地而君熙載豈無能  
為者知時不可為而能沈晦以免禍其智亦足稱也

繁欽於劉表數欲見奇杜襲喻之而止李驤為劉崇所殺至有吾負經濟之才乃為愚人謀事死固有甘心之歎然則熙載其賢乎

孫晟 密州人南唐宰相周世宗征淮南唐遣晟使周晟謂其副曰吾行必不免然終不負永陵一抔土後為世宗所殺正其衣冠南望拜曰臣以死報國乃就刑

宋傅霖 青州逸人乖崖稱曰傅先生天下士

王曾 益都人狀元丞相文正公弟皞字子融直集賢院初新舊五代史皆不與韓通立傳識者笑之皞著唐餘錄有紀志傳又博采諸家說劬裴松之三國志附注於下表韓通於忠義傳冠以宋初褒贈之典新舊史皆所不及文正嘗言曾平生之志不在溫飽皞器識若此可謂難兄難弟矣

蔡齊 萊州人狀元參政文忠公

呂夷簡 萊州人丞相文靖公六世孫伯恭號東萊先

生

宋會要濱州有夷簡祠公通判濱州奏不稅農器王曾知其有相業

王從善

青州人太宗雍熙二年始踰冠九經及第見

長編

李之才

青州人師穆伯長博陳希夷先天易嘗謂邵

康節曰科舉之外有義理學義理之外有物理學物理之外有性命學康節曰願受教遂傳易學

麻希夢

前青州錄事參軍年九十餘居臨淄太宗以

高年詔至闕詢及人間利害敷對詳明訪以養生之

理對曰臣無他術惟寡情慾節聲色薄滋味詔以尚書工部郎中致仕賜金紫子景孫興國中登進士甲科孫溫其溫舒祥符中相繼第三人及第衣冠以為盛事天下稱麻氏教子有法 孫仲英幼有俊才七歲能詩以親亡祿不及養不復肯仕退居臨淄七里別墅博學高行鄉黨化服雖凶年盜不入其家富韓公文潞公龐莊公相繼鎮青皆致書幣薦其行義詔以為國子四門助教州學教授東方學者咸師之亦

年九十餘卒

賈先 臨淄人登進士真宗賜名同改字希德以扶道  
著書為已任著山東野錄七篇頗類孟子奏疏言丁  
謂造作符瑞以誣皇天以欺先帝今幸為姦發竄逐  
請明告天下還寇萊公以明忠邪終以孤直不偶官  
止殿中丞卒門人謚曰存道先生

王樵 字肩望淄川人性超逸深於老易善擊劍有槩  
世之志廬梓桐山下不交塵俗山東賈同李冠皆尊

仰之咸平中契丹內寇舉族北俘累年乃歸刻木為  
親葬真山東立祠奉侍終身太守劉通詣樵踰垣遁  
去其後高弁知州事范諷為通判相與就見之李冠  
以詩寄之曰霜臺御史新為郡棘寺廷評繼下車首  
謁梓桐王處士教風從此重詩書晚自號贅世翁豫  
卜地壘石名繭室刻銘其上曰生前殺軀以虞不備  
沒後寄魂以備不虞後感疾即入繭室中自掩戶乃  
卒命以古劒徇葬著遊邊集二卷安邊三策說史十

篇濟南李芝為贅世先生傳治平中淄川詩僧文幼  
即其地起祠祀樵其為世景慕如此

劉孟節 壽光人少師种放天姿絕俗篤古好學酷嗜  
山水青之南有治原歐冶子鑄劍之地山奇水清叢  
筠古木氣象幽絕孟節欲隱其間富韓公為築室泉  
上詩以餞之曰先生已歸隱山東人物空其後范文  
正公文潞公皆優禮之欲薦之朝孟節懇辭少時嘗  
寓龍興僧舍往往凭欄獨立懷世事手拍欄干吁唏



太息有詩曰讀書誤我四十年幾回醉把欄干拍見  
司馬溫公詩話

張荷 壽光人師事种放與吳遁魏野楊朴宋澥為友  
性高潔為文奇澁著過非九篇放謂隋唐以來綴文  
之士罕能及之終以運蹇不遇卒有詩文三卷見澥  
水燕談

蘇丕 青州人祖德祥建隆四年狀元丕有高行少時  
一試禮部不中拂衣去居泃水之濱五十年不踐城

市歐陽文忠公鎮青言於朝賜號沖退處士年八十餘卒

周起 鄒平人母感吉夢而生父異之謂必大其門因名曰起第進士通判齊州召直史館真宗東封羣臣多獻文頌起獨上書言天下之勢患於安逸而忽於兢業真宗佳之拜諫議大夫終樞密副使

劉廷式 齊州人蘇軾知密州廷式為通判初廷式未遇時約取鄉人之女及第後女喪明廷式卒娶之女

死喪之踰年而哀不衰因不復娶軾問曰哀生愛愛  
生色君愛何從生哀何從出廷式曰吾知喪吾妻而  
已若緣色生愛緣愛生哀色衰愛弛吾哀亦忘則凡  
揚袂倚市目挑而心招者皆可以為妻邪軾深感其  
言廷式後監太平觀老于廬山絕粒不食而面目奕  
奕有光步峻坂如飛以壽終

姜遵 淄川人初舉進士為蓬萊尉以擊搏知名天聖  
七年拜樞密副使卒贈吏部侍郎

明鎬 密州人參知政事與文彥博同時

李常 字公擇登州人知齊州齊多盜常得黥盜刺為兵置麾下詢知弭盜之術姦無所容嘗為富鄭公客李師中榜其間曰遺直坊東坡有詩

燕肅 字穆之青州人龍圖閣待制知審刑院請讞諸路冤獄有不當者釋其罪自是全活者衆肅有巧思嘗造指南車記里鼓及欹器蓮花漏世服其精

趙師民 字周翰臨淄人九歲能文第進士官至龍圖

閣直學士子彥若哲宗時翰林學士紹聖初章惇以  
彥若與修神宗實錄貶死

李覺 字仲明益都人舉九經起家知泗州遷禮記博  
士

賀元 琅邪人真宗東封謁於道左曰晉水部員外郎  
賀元再拜東坡記詩云舊聞父老晉郎官已作飛騰  
變化看聞道東蒙有居處願供菽水看燒丹蓋僊人  
也

雪竇禪 居琅邪山身被布衫五十年不易向薌林嘗  
為青州雪竇布衫倡云趙州無義漢雪竇老婆禪一  
川風雨後明月却當天

周沆 字子真益都人累官至樞密直學士安撫使溫  
公銘其墓云光普通判并州事公於河東銘曰古之  
君子德盛道尊望之儼然即之也溫公正衣冠嚴不  
可干施之于政乃仁乃寬吏畏而悛民思弗諼款銘  
垂美以告後昆碑今在益都城南駝山下

異人徐問真 維州人與歐陽文忠善一日求去甚力  
歐公留之不可曰我友罪我與公卿遊公使人送之  
果有鐵冠丈夫長八尺餘俟於道周以瓢覆酒於掌  
中以飲提筭童子遣回不知所往童子徑發狂亦莫  
知所終嘗教歐公引氣愈其足疾東坡試之亦驗

于燾 字彭年壽光人博學能文頗喜言兵慶曆中元  
昊數寇邊敵人乘釁聚兵求關南地丞相呂文靖公  
召彭年計之彭年云宜治西北行宮若將親征者以

壓其謀乃以大名府為北都二敵果請盟仁宗春秋  
高皇嗣未立登州岨嵎山數震彭年上疏曰岨嵎極  
東方殆東朝未建人心搖動之象宜早定儲以安天  
下齊宜為節度建英宗入繼乃由齊邸人以先識稱  
之

張蘊 淄川人咸平中契丹入寇淄川城壘不完刺史  
欲棄城奔南山蘊時為郡兵馬監押按劔曰刺史若  
出吾當斬以徇卒完城後為環州馬鎮鎮監押雖處



窮塞猶建孔子祠刻石為記范文正公書其碑陰以  
美之其後子孫皆以文學才行登侍從云

呂頤浩 齊州人南渡丞相忠穆公

內翰綦密禮 高密人徙濰州北海故人稱北海先生  
密禮隨高宗南渡掌王言凡下詔旨讀者感動時議  
以為中興之功非特將士宣力詔令亦有助焉如陸  
宣公之在奉天也見重如此以忤秦檜位不進

翰林侍讀

袁伯長云北海子孫見  
寓四明為衣冠名族

辛幼安 濟南人宋名臣言行錄黜稼軒不取朱文公  
稱曰稼軒帥湖南賑濟榜祇用八字雖只麤法便見  
他有才況其忠英之氣見于辭翰者不一嘗言曰敵  
人六十年後必滅敵滅而宋之憂方大其識如此宋  
人既以儉荒遇之而不柄用中原又止以詞人目之  
為可惜也故識之  
宋實錄載幼安贊韓侂冑用兵侂  
冑敗幼安獲罪於士論非也稼軒  
豪傑之士枕戈待旦有志於中原久矣宋人舉國聽  
之豈無所成侂冑之敗正陳同父所謂真虎不用真  
鼠枉用之所致  
以此議公可乎

金劉迎 東萊人太子司經有文集號山林長語章宋  
詔國學刊行

周馳 濟南人在太學以策論魁天下貞祐濟南破不  
肯降攜二孫赴井死

張行簡 莒州日照人詞賦第一人及第仕至翰林學  
士承旨備於禮文之學典貢舉三十年門生遍天下  
弟行中亦進士仕至叅知政事言虎賊必反抗權臣

高琪為士論所稱

右四人並  
見中州集

李國維 淄川人進士歷符離葉二縣令著清名蚤年

鄰家有害銀者兵後無人國維掩而不發

見楊素菴  
事言補

楊弘道

字叔能淄川人金末補父廕不就與元遺山

劉京叔楊煥然輩皆以詩鳴大為趙閑閑諸公所稱

避亂走襄漢宋人辟為唐州司戶兼文學不久復棄

去晚寓益都嘗一見李壇議不合為用事者所嫉浮

沈間里以詩文自娛著小亨集事言補等書行于世

延祐三年贈文節

齊乘卷六

齊乘後序

昔我先人為國子助教每謂潛曰吾日與諸生講習所  
業暇則又與翰苑諸名公唱和詩章詩乃陶冶性情而  
已若夫有關於當世有益於後人者宜著述以彰顯焉  
吾生長於齊齊之山川分野城邑地土之宜人物之秀  
此疆彼界不可不纂而紀之也迨任中書兵部侍郎奉  
命山東於是周覽原隰詢諸鄉老考之水經地記歷代  
沿革門分類別為書凡六卷名之曰齊乘藏於家囑潛

曰吾或身先朝露汝其刻之先人既卒常切切在念第  
以選調南臺又入西廣匆匆未遑遂志茲幸居官兩浙  
始克搏節奉稟命工鏤板以廣其傳以光先德叅政伯  
脩先生已詳序於前矣有仕於齊者願一覽焉至正十  
一年辛卯秋七月奉訓大夫兩浙都轉運鹽使司副使  
男潛百拜謹識

齊乘釋音

卷一

沿

緣音響

酷析

錫音括

古活

煎

實側切

虞

峴

胡典切

山下

現同

莞

古桓切

又胡官

辟

音壁

要

去聲

干寶

搜神記是

其撰作于

非分

去聲

殖

寔音沫

水名

菑

音縑

澍

音時

奚

胸

音勑

酈

道元

音歷

注水

公玉帶

濟南人公玉姓

帶名玉一音璊

閱

音馨

激切

頡

音額

輦

粥

與

驚蚌

步項

沐載

沐音木

劇

巨戰

鸞

音岳

猓

音奴

刀切

髻

音術

巷

岫

音包

黃能

奈平聲

三足

瓊

音坦

李全

不期



基 音切 勒 音切 斥 充夜切 呆 音浮 蜚 音慎 艘 音騷 醯 才何切 嶺 音合 廬 音合

蹲 音存 窪 音蛙 澠 音繩 窖 音教 趵 音豹 突 音卒 突 音他 突 音骨 突 音切 方 音言 江 音湘 謂

貌 去 音說 文 音不 順 音忽 出 音也 從 音到 子 音易 云 音突 如 音其 來 音如

易 音突 字 音也 今 音駛 使 音去 聲 音疾 俗 音作 瓦 音非

## 卷二

龍 音子 且 音余 項 音羽 將 音也 淀 音甸 而 音而 澣 音水 胡 音卦 切 音禪 去 音聲 黔 音黔 陬 音郡 鉗

洎 音米 直 音當 固 音沽 滙 音潰 漸 音平 祊 音崩 凍 音速 搜 音二 圮 音橋 移 音承 承 音澄

又 音去 般 音盤 灤 音柏 奔 音掩 荏 音仕 之 音殺 去 音聲

卷三

嶷

岳力切小兒有知也

并

去聲杼

佇

音與帆同

鄆

音運

員

音運

宙

音宙

睿

音銳

費

音祕

嶧

音亦

鄮

慈陵切

僑

音橋

隔

音隔

郛

音倪

黹

音儒

錐

音澁

音傲

瞳

吐管切

輓

音晚

嶮

音愚

食

其音異

基

商

音滴

今

音縣

挑

周亞夫所封

漂

音塔

印

音昂

盼

音分

瑗

音院

圮

音聲

壞

也

漚

音切

卷四

玄文

玄姓

髡

音坤

駢

音便

平

奭

音釋

慎

到

慎姓

環

音淵

環姓

淵名

鄩

音攜

斟

音斟

灌

音灌

羿

音義

澆

音倪

弔

切

泥

之

璠

音繁

切 贛

古暗切

驂

參音切

荊

蒲經切

鄧

進音切

邵

午姑切

郊

談音切

虺

蛇音切

蝮

也又

人 沓

達合切

魚

音昆上聲

殛

棘音切

炔

人名桂

愜

州音切

言

硯音切

礪

音切

苛

何音切

醕

權

許慎切

間

去聲

斲

音切

胙

助音切

蓋

音切

殪

於計切

苛

何音切

醕

何音切

醕

蒲 蠨

蟲子也

顓

音專

皤

音切

盾

音切

韃

音切

韃

音切

肥

音切

肥

音切

肥

# 卷五

楷

口駭切

楷

書也

毅

音切

勣

音切

薨

音切

隳

音切

輅

音切

琛

音切

琛

切 搏

音切

狷

音切

禰

音切

巨

音切

薊

音切

覺

音切

說

音切

族

音切

族

使犬 逢

音切

湫

音切

鄭

音切

頡

音切

迭

音切

隗

音切

鬻

音切

鬻

音切

鬻

崧音 陞音 凱音 仆音 付音 徼音 邀音 狙音 切音 殺音 癢音 力音 烏音 昔音 夸音 誇音 雋音 究音

切攷音漬盜音貼貼都牒切躡所倚切輻音福湊千候切賈音古

恠與各  
同  
聃他甘  
切  
耳音

卷六

俑音勇  
 諺米切  
 纂幼集也  
 作管切  
 勝平聲  
 鏑音固  
 鎬音浩  
 頰庚切  
 頤音間

去聲  
隰音習  
人名  
辟音避  
鱣音張連切  
蚺音蛙  
鼃音池  
盼匹練切  
鞅音央  
上聲  
詛

咀音與同怵音熾出昌志切詘音屈蠋音蠟賈音假淖音鬧臄音去聲穰音常

苴七余切 敷音衆 衷音中 又 嗇音塞 絀音出 蹙音促 沮音阻 倩七性切

芻

樞音撲切普木

遂

音緝音聶

絨

音域

綬

七公切

竅

詰弔切

緹

音提

紫

娟

營切

舍

上聲

睦

綏音

僧

音檜

哀

音褒

邴

音丙

嘏

音假

旄

音兆

弘

音與

潭

音屬

祝

音渠

璩

音思

贊

紆切

絞

音上

爨

音交

爨

音竄

杯

蒲候切

褒

毛博

切

墅

音聚

贅

音綴

种

音蟲

讞

音上

當

音聲

諼

音萱

綦

音崇

密

音其

傖

鉏庚

切

琪

音其

# 後序

治

音野

調

去聲

搏

音上

奉

與俸同

稟

與廩同

鏤

音漏